



Deddf Sgorio Hylendid Bwyd (Cymru) 2013

2013 dccc 2

Hysbysu'r cyhoedd am sgoriau hylendid bwyd

9 Troseddau

- (1) Mae gweithredwr sefydliad busnes bwyd yn cyflawni trosedd os yw, heb esgus rhesymol—
 - (a) yn methu ag arddangos sticer sgôr hylendid bwyd dilys yn y man a'r modd a ragnodir;
 - (b) yn arddangos sticer sgôr hylendid bwyd annilys;
 - (c) yn methu â chadw sticer sgôr hylendid bwyd dilys;
 - (d) yn ildio ei feddiant ar sticer sgôr hylendid bwyd i unrhyw berson heblaw am swyddog awdurdodedig i awdurdod bwyd;
- (2) Mae gweithredwr sefydliad busnes bwyd hefyd yn euog o drosedd, os, heb esgus rhesymol—
 - (a) gwrthodir cais person i gael ei hysbysu ar lafar am sgôr hylendid bwyd; neu
 - (b) rhoddir gwybodaeth anwir neu gamarweiniol i berson sy'n gwneud cais o'r fath am sgôr hylendid bwyd sefydliad.
- (3) Mae sticer sgôr hylendid bwyd yn aros yn eiddo i'r awdurdod bwyd.
- (4) Mae person yn cyflawni trosedd os yw—
 - (a) yn fwriadol yn newid, yn difwyno neu fel arall yn ymyrryd â sticer sgôr hylendid bwyd, a
 - (b) yn gwneud hynny heblaw er mwyn ei dynnu o'r man lle y mae'n cael ei arddangos, neu er mwyn ei ddistrywio, yn unol ag adran 7(6).